



Il podest tar la concurrenza da pistolas. (da san.) Guido Zellweger, Roman Clavadetscher ed Elmar Fallet.

FOTOS G. N. STGIER

## Cun ina excepziun be victorias dals favurits

Cuira: tir d'avertura

DA GION NUTEGN STGIER / ANR

■ **A la fin d'emna ha gi lieu al Rossboden a Cuira il tir d'avertura dals matscheurs grischuns. Grazia a las bunas relaziuns ha l'elita da tir chantunala persvas gia tar l'emprima occurrenza. Per ina surpraisa ha procurà il tiradur da pistola Roman Clavadetscher.** Per ina giada han ils matscheurs da noss chantun gi pauc vent al stand da tir Rossboden a Cuira. Tiers la glisch plitost viva è vegni sajettà ferm e precis. Il tir d'avertua è adina ina occurrenza plain tensiun, cun esser quel l'emprim da la stagiun da sajettar che cuzza fin a la fin d'october.

Ina vulp veglia sisum il podest

Cun l'arma da militar, en il tir duas posiziuns (30 culps en venter e 30 culps en schanugl) ha gudagnà cun *Otto Morell*

ina vulp veglia l'occurrenza. Il tiradur da Samedan ha fatg 542 puncts e festivà ina ulteriura victoria en sia lunga carriera sco matscheur. L'um da 70 onns tutga anc adina tar l'elita grischuna da tir ed el è cunzunt er ina ferma pitga per il cader dals tiradurs da la Federaziun Grischuna dal Sport da Tir (BSV). Terminà il tir d'avertura en quella categoria sin il segund plaz ha *Robert Studer* da Castrisch, er el in tiradur da vaglia. Il Sursilvan ed anteriur campiuon svizzer ha sajettà be in punct damain ch'il victur Morell. Cumplettà il podest ha *Dirk Frischknecht* da Tusaun, grazia a ses 536 puncts. Festivà in ulteriur success en la categoria arma da sport duas posiziuns ha ina giada dapli *Georg Maurer* da Favugn. El è vegni sin 583 puncts, suandà da *Domenic Lorenzetti* da Cuira che ha tratg 575 puncts sco *Remo Capeder* da Laax er cun ses terz post. Per *Otto Bass* da Rabius è sa reultà

be plaz quatter cun in resultat da 568 puncts.

Dominanza dals tiradurs da Tumeagl

Ina classa per sasez èn lura stads ils tiradurs da Tumeagl en la categoria arma da militar en venter. Tar il matsch d'avertura han els gist festivà ina tredubla victoria. Sisum il podest è stà *Urs Nauli* cun far 573 puncts, suandà da *Norbert Caviezel* cun 570 puncts e terz è vegni *Hansruedi Giger*, grazia a ses 569 puncts. Cun l'arma da standard ha cun *Meinrad Monsch* da Zezras gudagnà il grond favurit l'occurrenza. El ha tratg 593 puncts, in ferm resultat cun las suandantas passas: 98, 99, 100, 99, 97, 100. Ses figl *Roger Monsch* è vegni segund cun 590 puncts. Plaz trais è lura i ad *Urs Brazerol* cun il medem resultat, il tiradur da Farrera e victur da l'onn 2018.

Terrada per Elmar Fallet

Tar il tir da pistola 50 meters era bain il Jauer *Elmar Fallet* il grond favurit. Da quintar aveva el cun ina concurrenza da *Guido Zellweger*, l'um da Zernez. Omadus han lura gi cun *Roman Clavadetscher*, il giuven tiradur da pistola da St. Maria, in ferm concurrent. L'electricist da 24 onns ha gudagnà il tir d'avertura cun 564 puncts e procurà per la gronda surpraisa dal di. *Guido Zellweger* è vegni sin plaz duas cun 562 puncts. Gist tants puncts ha er tratg Fallet, il campiuon svizzer dal 2017 sin quella distanza. A la fin da l'occurrenza è *Roman Clavadetscher* sa musà cuntent er cun avair tratg pli precis che ses duas gronds idols ed amis Fallet e Zellweger.



Renata Tomaschett, ina da las bunas olmas davos las culissas da las occurrenzas da tir.



Be in punct differenza. (da san.) Robert Studer ed Otto Morell.



Ils duas matscheurs Meinrad Monsch (san.) ed Urs Brazerol.



Dirk Frischknecht, in dals matscheurs giuvens.



L'elita da tir da Tumeagl. (da san.) Norbert Caviezel, Urs Nauli e Hansruedi Giger.



Ina giada dapli sin il podest: l'Engiadinais Domenic Lorenzetti.



Relaziuns optimalas tar il tir d'avertura al Rossboden a Cuira.